



Oet de serie

- **De BABYBOOM- GENERATIE** -

Deil 3

de Kerk

Ózze ieërste Heilige Communnie deje veur in ein euvervolle Sint-Lambertuskerk
Met families, met de opa's, oma's, omes en tantes veulde veur ós sjterk

Veur sjtónge sjtatig en plechtig met tachtig jónges en maedjes
Det ware tachtig sjoeëne plaetjes

De maedjes in 't lank met witte kledjes en sjeunkes, tasje en 'n kruuënke oppe kop
Bes knap en dao keke veur as jónges toen al aardig van op

De jónges lepe in sóndepe pekskes, wit haempje, nondejuuke,
zjwart gelakde sjoon, det waar ech get sjiëks
Mer behalve 'n teske mét sjöttelke, kemunieprintje of 'n kwartje kreges veur nieks

Veur ware neet altied aeve leef en katholiek
En maakde ós dao-euver ouch waal ens neet diek

Den zote veur as misdeners waal ens aan de roeëje wien
De sjtap daonao deej den waal get "pien"

Want det gings se bie pesjtoeër of keplaon opbiechte
Jao veur ware aaf en toe echte sjmiechte

Met Paose wilde de ganse klas misdener zien
Vrie van sjoeël, kleppere en saoves aan de henj en de oeëre pien

Goeje Vriedig zote veur om drie oer in de kerk met de ganse klas
En haje den nag nao viertig daag vaste de vastelaovessjlók in de kas

Veur kreges oet de goude kelk ózze ieërste heilige hostie
Brachte palmtek rónjdj en ware met 'n kwartje as "Heitje veur karweitje" blie

De misdeners hoofde met 'n trouwmis neet nao sjoeël
En det vónje die waal, en veur minder cool

Nao de Heilige Mis woort geld gezóch en gevónje tösse de kerkbenk
En 't ies van Jamin, Fleure of Teunissen Baer, waar den wie 'n "gesjenk"

Veur zónge in 't knapekerkkoeër van Sint-Lambaer in de Latiense taal
En lepe as page of misdener de processie veur "de Hemel" pontificaal

Van de kerk nao Pesjtöör Vranckenlaan, en
nao de Sint-Lambertuskepel waar alles prachtig versierd
Gaele en witte vlegskes links en rechts langs de Kesselsewaeg en de Hoover Wieërd

Prachtige blomemotieve loge oppe sjtraot met vuuël kleure
En Heilig Hartbeelde op täöfelkes sjtónge met kaerse en blome veur de deure

Monseigneur Lemmens vormde ós 'ne tied later
Dus ware veur nao 't duipe, de ieërste én de plechtige kemunie "gesjik" veur keplaon of
pater

Veur woorte werm gemaak in de zesde klas veur 'n opleiding in Rolduc
Maar de meiste hele zich toen keduuk

De tied van de poefbókse en sjtrakke pek woort 'n sjtök vriejer
Mer sóndes drie kieër nao de kerk waar get te euverdreve
Eine kieër woort det en det is zoeë gebleve

JOHN GUBBELS

(Met get dichterlike vrieheid)